



Samgöngu- og sveitarstjórnarráðuneytið
Samráðsgátt stjórnvalda

Reykjavík, 16. ágúst 2021

Efni: Hvítbók um net- og upplýsingaöryggi, mál nr. 148/2021

Samtök fjármálafyrirtækja (SFF) hafa kynnt sér Hvítbók til samráðs vegna draga að nýrri stefnu um net- og upplýsingaöryggi sem er nú til umsagnar í samráðsgátt stjórnvalda. SFF fagna því að stjórnvöld setja sér þá metnaðarfullu stefnu sem fram kemur í Hvítbókinni. Efling net- og upplýsingaöryggismála þarf að vera eitt af forgangsmálum stjórnvalda og þannig lagður grunnur að því að Ísland standi jafnfætis nágrannabjóðum sínum á sviðinu. Vel útfærð net- og upplýsingaöryggisstefna er þýðingarmikil fyrir almenning, fyrirtæki og stofnanir í landinu. Þetta rímar vel við markmið SFF og fögnum við öllum áföngum í átt að því markmiði.

Í Global Cybersecurity Index 2020 sem Alþjóðafjarskiptasambandið birtir reglulega og vísað er til í Hvítbókinni kemur fram að Ísland í 31. sæti af 46 ríkjum í Evrópu og í 58. sæti á heimsvísu af 182 ríkjum. Ísland hefur verið að færast ofar á þennan mælikvarða en ljóst er að þessi niðurstaða er óviðunandi og afar brýnt að búið sé þannig um hnútana að við séum á pari við þær þjóðir sem fremst standa í netöryggismálum.

Í málefnum netöryggis er mikilvægt að aðilar geti leitað til vel skilgreinds aðila sem hefur skýrt hlutverk og umboð til athafna. Þetta á sérstaklega við aðildarfélag SFF sem sinna mikilvægum grunnstoðum samfélagsins. Því er mikilvægt að hlutverkaskipting sé skýr svo allir hlutaðeigandi séu fyllilega meðvitaðir um til hvers er ætlast af þeim og hverju þeir mega ætlast af öðrum hlutaðeigandi.

Hér á landi starfar CERT-ÍS netöryggisveit á vegum Póst- og fjarskiptastofnunar. Hún starfar samkvæmt 47 gr. fjarskiptalaga nr. 81/2003 og reglugerð nr. 475/2013. Sveitin hóf formlega starfsemi árið 2013. Aðildarfélag SFF hafa bent á mikilvægi þess að CERT-ÍS skilgreini betur þjónustuhlutverk sitt. Vegna eðlis starfsemi aðildarfélaga eru þeim skorður settar varðandi samstarf, það á einnig við um samstarf gegn stafrænum glæpum. Því er sérstaklega mikilvægt að

starfsemi CERT-ÍS taki mið af þeim hömlum og fái viðunandi ferla og valdheimildir til þess að bregðast hratt og örugglega við þeim hættum sem steðja að. Mikilvægi þess að CERT-ÍS geti brugðist hratt og örugglega við í góðu samstarfi við aðildarfélögin er lykilatriði til að vernda traust neytenda á rafrænum lausnum. SFF hafa ásamt aðildarfélögum fundað að undanfögnu með CERT-ÍS og hefur sveitin látið í ljós samstarfsvilja sem við fögnum.

Netöryggismál eru afar kvikur málaflokkur og þurfa stjórnvöld, fyrirtæki, stofnanir og einstaklingar að vera tilbúin að bregðast mjög hratt við þeim áskorunum sem upp koma. Hvort sem um er að ræða breytingar á ferlum, tæknilegum vörnum, eftirliti, viðbragðsáætlunum eða öðru sem mikilvægt er til að takast á við upþákomur tengdar upplýsingaöryggi. Því er mikilvægt að viðbragðsflýtir sé tryggður ýmist til að bregðast hratt við yfirvofandi vá og/eða yfirstandandi árásum.

SFF leggja áherslu á að verkefnið verði unnið hratt og örugglega og að lögð verði áhersla á að Ísland verði í farabroddi þegar kemur að netöryggismálum. Staðreyndin er sú að Ísland hefur verið eftirbátur þeirra þjóða sem við berum okkur iðulega saman við í net- og upplýsingaöryggismálum. Úr því þarf að bæta sem allra fyrst og búa þannig í hagin að viðbragðsaðilar dragist ekki aftur úr tækniþróuninni. Skýr stefna og skjót viðbrögð eru almannahagur.

F.h. SFF



Arnar I. Jónsson, sérfræðingur